

## **KUSHTET STANDARDE MINIMALE TË SIGURIMIT NË GRUP TË PUNONJËSVE TË MINIERAVE NGA AKSIDENTET PERSONALE NË PUNË, TË MIRATUARA NGA AUTORITETI I MBIKEQYRJES FINANCIARE ME VENDIM BORDI NR. NR.92, DATË 14.08.2008**

### **I. Përcaktime**

**‘Aksident’ ose ‘Aksidental’** – një ngjarje e papritur dhe e paparashikuar që ndodh në mënyrë rastësore pa vullnetin e të Siguruarit, e identifikueshme për sa i përket kohës dhe vendit të ndodhjes, që ka impakt trupor të drejtpërdrejtë, të jashtëm dhe të dhunshëm mbi të Siguruarin dhe që sjell si rrjedhojë humbjen e jetës, paaftësinë për punë ose dëmtime trupore të të Siguruarit.

**‘Dëmtim Trupor Aksidental’** – dëmtim trupor që pëson I Siguruari brenda periudhës së Policës, që shkaktohet vetëm dhe drejtpërdrejt nga mjete Aksidentale (duke përjashtuar sëmundjet ose çrregullimet shëndetësore) dhe që sjell si rrjedhojë humbjen e jetës ose paaftësinë për punë të të Siguruarit brenda 12 muajve kalendarikë nga data e Aksidentit.

**‘Përfitim’** – shuma përkatëse e sigurimit ose pjesë të saj siç përcaktohet në Formularin e Policës dhe Tabelën e Përfitimeve, e pagueshme nga Siguruesi në përputhje me kushtet dhe parashikimet e kësaj Police për çdo ngjarje ose dëmtim që mbulohet nga kjo Policë.

**‘Siguruesi’** – shoqëria e sigurimeve e autorizuar sipas rregullave në fuqi për sigurimin e klasës së ‘Aksidenteve Personale’.

**‘Data e Fillimit’** – data në të cilën fillon mbulimi në sigurim sipas kësaj Police.

**‘I Siguruar’** – individ(ët) e emërtuar si të siguruar në Listën e të Siguruarve ose në ndryshime të mëvonshme të saj, të moshës 18 (tetëmbëdhjetë) vjeç deri në 65 (gjashtëdhjetë e pesë) vjeç në datën e fillimit të Policës.

**‘Paaftësi e Përhershme e Plotë’** – paaftësia që e ndalon plotësisht të Siguruarin për të ushtruar profesione/punësime për të cilat është i aftë nga arsimimi, trainimi ose përvoja, dhe që zgjat të paktën 12 muaj të pandërprerë dhe në fund të kësaj periudhe është pa shpresë përmirësimi.

**‘Paaftësi e Përhershme e Pjesshme’** – paaftësia që e ndalon pjesërisht të Siguruarin për të ushtruar profesione/punësime për të cilat është i aftë nga arsimimi, trainimi ose përvoja, dhe që zgjat të paktën 12 muaj të pandërprerë dhe në fund të kësaj periudhe është pa shpresë përmirësimi.

**Paaftësi e përkohshme e pjesshme** – nënkupton pamundësinë e përkohshme të personit të siguruar për të kryer pjesë të detyrave të punës së zakonshme profesionale, ndërsa është nën kujdesin e rregullt dhe ndjek instruksionet apo këshillat e mjekut.

**Paaftësi e përkohshme e plotë** – nënkupton pamundësinë e përkohshme të Personit të Siguruar për të kryer të gjitha detyrat profesionale, ndërsa është nën kujdesin e rregullt dhe ndjek instruksionet dhe këshillat e mjekut.

**‘Policëmbajtës/Kontraktues/-** punëdhënësi i përcaktuar si Kontraktues në Formularin e Policës.

**‘Policë’** – këto kushte, Formulari dhe cdo shtojcë ose ndryshim i mëvonshëm I nënshkruar nga Siguruesi.

### **II. Përfundimi i mbulimit në sigurim**

#### **1. Përfundimi i mbulimit në sigurim**

Mbulimi në sigurim për të Siguruarin do të përfundojë me ndodhjen e më të hershmes prej ngjarjeve të mëposhtme:

a. përfundimi i periudhës së Policës; b. data në të cilën I Siguruari përfundon së qeni punonjës i Kontraktuesit; c. kur ka përfunduar ekzekutimi i tabelës të përfitimeve të përcaktuara në policë.

#### **2. Përfshirja dhe largimi**

Kjo Policë do të mbulojë automatikisht në sigurim të gjithë punonjësit e pranishëm dhe të rinj të Kontraktuesit nga data e fillimit të punësimit, me kusht të të njoftimit që i bën Kontraktuesi Siguruesit brenda 10 ditësh nga fillimi i punësimit për cdo punojës që shtohet. Mbulimi në sigurim përfundon në datën e përfundimit të punësimit. Në rast kërkesë për dëmshpërblim Kontraktuesi duhet t’i paraqesë Siguruesit prova me shkrim të punësimit. Kontraktuesi gëzon të drejtën e zëvendësimit të një punonjësi të larguar me një të ri pa prim shtesë, me kushtin e njoftimit brenda 10 ditëve nga data e zëvendësimit.

### **III. Përfitimet**

#### **1. Mbulimi në sigurim**

Në se gjatë periudhës që kjo Policë është në fuqi I Siguruari pëson Dëmtim Trupor Aksidental në punë me pasojë cdonjerën prej dëmtimeve të përshkruara në Tabelën e Përfitimeve, atëherë Siguruesi, me marrjen dhe miratimin e provave të nevojshme, do të paguajë shumën përkatëse të përfitimit sipas Tabelës së Përfitimeve.

### **IV. Përjashtime**

Siguruesi nuk do të mbulojë humbjen e jetës, paaftësinë për punë apo dëmtime trupore të të Siguruarit që janë rrjedhojë direkte ose indirekte e:

- luftës, pushtimit, veprimeve të armikut të jashtëm, armiqësive/luftimeve (pavarësisht nëse është shpallur luftë ose jo), luftës civile, rebelimit, revolucionit, revoltës, kryengritjes; - reaksionit bërthamor, rrezatimit bërthamor ose ndotjes radioaktive, pavarësisht nga burimi i tyre; - Sindromës së Deficiencës Imunitare të Fituar (AIDS) dhe gjendjeve shëndetësore të lidhura me të; - sëmundjeve, kontrolleve, kurimeve apo ndërhyrjeve kirurgjikale që nuk janë rezultat i aksidentit në punë gjatë periudhës së sigurimit; - vetëvrasjes ose tentativës për vetëvrasje ose akteve të kryera me dashje apo të tentuara nga I Siguruari / dhe ose përfituesi; - pjesëmarrjes në sporte të rrezikshme si parashutizmi, ngjitjet malore, fluturimi me avionë pa motor, zhytjeve nënujore, garave motorrike; - pjesëmarrjes së të Siguarit në zënka e grindje; - dehjes, përdorimit të tepruar të psikofarmaceutikëve, drogës ose aluçinanteve; - drejtimit të mjeteve motorrike tokësore, ujore, ajrore, pa qenë i paisur me dëshminë përkatëse të aftësisë, apo të qenit pasagjer në mjetet e lartpërmendura të pa licensuara për transport pasagjerësh; - përdorimit të lendeve eksplozive dhe korodive, përveç rasteve kur është në përmbushje të detyrës profesionale; - përfshirjes së të Siguarit në aktivitete të paligjshme, apo kriminale; - çdo lloj defekti fizik apo mendor i të Siguarit që nuk është shkaktuar nga aksidenti në punë gjatë periudhës së siguruar.

## **V. Procedura për kërkesa për pagesë**

### **1. Njoftimi i ngjarjes së sigurimit**

Çdo ngjarje ose dëmtim që mund të çojë në një kërkesë për pagesë/përfitim sipas kësaj Police duhet t'i njoftohet me shkrim Siguruesit brenda 5 (pesë) ditësh pune nga data e ndodhjes.

Mosnjoftimi brenda periudhës kohore të parashikuar më sipër nuk do ta bëjë të pavlefshme kërkesën për përfitim, nëse provohet se nuk ka qenë e mundur dhënia e njoftimit dhe se njoftimi është dhënë sapo ka qenë mundur në mënyrë të arsyeshme.

I Siguruari ose Kontraktuesi, me shpenzimet e tyre, do t'i paraqesin Siguruesit dokumentacionin, informacionin dhe dëshmitë që mund të kërkojë Siguruesi.

Siguruesi do të ketë të drejtë, por jo detyrim, që me shpenzimet e tij t'i kërkojë të Siguarit të kryejë kontrolle mjekësore gjatë shqyrtimit të kërkesës për përfitim.

### **2. Pagesa e përfitimit**

Siguruesi do ta trajtojë Kontraktuesin/Policëmbajtësin (punëdhënësin) si përfaqësuesin ligjor të kësaj Police dhe çdo shumë e pagueshme sipas kësaj Police do të paguhet për llogari të të Siguarit në përputhje me kërkesën dhe udhëzimet e Kontraktuesit dhe pagesa e kryer në këtë mënyrë do ta çlirojë Siguruesin nga çdo përgjegjësi e mëtejshme për përfitim në fjalë.

3. Nëse kryhen kërkesa për përfitim që janë mashtruese në ndonjë aspekt, ose nëse Kontraktuesi, I Siguruari apo përfaqësues që veprojnë në emër e për llogari të tyre përdorin mjete ose metoda mashtrimi për të përfituar pagesa sipas kësaj Police, atëherë Siguruesi nuk do të ketë përgjegjësi për pagesën e këtyre kërkesave.

## **VI. Parashikime të tjera**

### **1. Kufijtë gjeografikë**

Mbulimi i dhënë nga kjo Policë është i vlefshëm brenda kufijve territorialë të Republikës së Shqipërisë.

### **2. Përmbushja e parashikimeve të Policës**

Mospërmbushja e parashikimeve të kësaj Police do t'i bëjë të pavlefshme kërkesat për përfitim.

### **3. Pagesa e primeve**

Primi i sigurimit paguhet sipas përcaktimeve në formularin e Policës së Sigurimit. Nëse primi nuk paguhet si më sipër atëherë kjo Policë bëhet e pavlefshme dhe mbulimi i dhënë prej saj përfundon prej fillimit.

### **4. Juridiksioni**

Çdo kundërshti mbi këtë Policë që nuk mund të zgjidhet me mirëkuptim reciprok është juridiksion i legjislacionit të Republikës së Shqipërisë dhe Gjykatës së Rrethit ku është lëshuar Polica.

**VII. Tabela e Përfitimeve** (për dëmtimet shëndetësore shkaktuara nga aksidentet në punë të punonjësve) Përfitimi i pagueshëm në përqindje ndaj Shumës së Sigurimit të përcaktuar në Formular

#### **A Humbja e jetës 100%**

#### **B Paaftësi e Përherëshme**

1 Paaftësi e Plotë e Përherëshme 100%

2 Humbje ose humbje e plotë e përherëshme e përdorimit të dy gjymtyrëve 100%

6 Humbje e plotë e përherëshme e shikimit në të dy sytë 100%

7 Humbje e plotë e përherëshme e shikimit në një sy 50%

8 Humbje ose humbje e plotë e përdorimit të një gjymtyre dhe humbja e shikimit në një sy 100%

9 Humbje e të folurës dhe dëgjimit 100%

- 10 Humbje e plotë e përhershme e dëgjimit: a) në të dy veshët 40%; b) në një vesh 10%
- 11 Humbje e plotë e të folurës 30%
- 12 Humbje ose humbje e plotë e përhershme e përdorimit të pesë gishtërinjve të dorës: a) të djathtë 40%; b) të majtë 30%
- 13 Humbje ose humbje e plotë e përhershme e përdorimit të gishtërinjve të dorës: a) gishti i madh i dorës së djathtë 10%; b) gishti i madh i dorës së majtë 8%; c) gishti tregues, apo i mesit i dorës së djathtë 6% b) gishti tregues, apo i mesit i dorës së majtë 4%; c) gishti i parafundit, ose gishti i vogël i dorës së djathtë 4%; d) gishti i parafundit, ose gishti i vogël i dorës së majtë 2%;
- 14 Humbje ose humbje e plotë e falangës së gishtit të dorës 1/3 e gishtit përkatës
- 15 Humbje ose humbje e plotë e përhershme e përdorimit të gishtërinjve të këmbës: a) të gjithë gishtërinjtë e një këmbë 10%; b) një gisht i këmbës 3%;
- 16 Imobilitet i plotë i përdorimit të një këmbë në nivelin e nyjes së këmbës 30%
- 17 Imobilitet i plotë i kofshës në nivelin e artikulacionit koksofemoral 40%
- 18 Imobilitet i plotë i artikulacionit të kycit 30%
- 19 Dëmtimi i plotë një veshke 30%
- 20 Dëmtimi i plotë i shpretkës 10%
- 21 Djegie të shkallës së tretë

*Për dëmtimet shëndetësore që nuk paraqiten në këtë tabelë, shkalla e dëmtimit përcaktohet nga autoriteti mjekësor ligjor përkatës*

*Zona Dëmtimi si përqindje e Sipërfaqes së Përgjithshme të Trupit*

- |         |                                                     |      |
|---------|-----------------------------------------------------|------|
| - koka  | e barabartë ose më e madhe se 2% por më pak se 5%   | 20%) |
|         | e barabartë ose më e madhe se 5% por më pak se 8%   | 35%) |
|         | e barabartë ose më e madhe se 8%                    | 75%) |
| - trupi | e barabartë ose më e madhe se 10% por më pak se 15% | 20%) |
|         | e barabartë ose më e madhe se 15% por më pak se 20% | 35%) |
|         | e barabartë ose më e madhe se 20%                   | 75%) |

**C: Paaftësia e përkohshme -** Përfitimi i pagueshëm **ditor** si përqindje ndaj Shumës së Sigurimit të përcaktuar në Formular:

1 Paaftësia e përkohshme e plotë 0,025% , por jo më shumë se 2,000 lekë;

2 Paaftësia e përkohshme e pjesshme 0,010%, por jo më shumë se 1,000 lekë

**D. Përfitimi për shpenzime mjekësore** - paguhet si përfitim shtesë nga Siguruesi. Përfitimi për të gjitha shpenzimet mjekësore nuk mund të jetë më i lartë se 5% e shumës së siguruar.

**E. Përfitimi për trajtimin mjekësor jashtë vendit** - paguhet në rastet kur I Siguruari për shkak të aksidentit në punë gjatë periudhës së siguruar, ka nevojë për trajtim mjekësor të specializuar. Në këto raste I Siguruari përfiton mbulimin e shpenzimeve të mjekimit në një klinikë të specializuar jashtë vendit deri në masën 100% të shumës së sigurimit të përcaktuar në formular. Vendimi për dërgimin e të Siguarit në një klinikë të huaj merret nga organi mjekësor kompetent, me miratimin e Siguruesit.

## **VIII. Kushte të vecanta**

**1.** Shuma e sigurimit për çdo punonjës të siguruar, e përcaktuar në formularin e Policës së sigurimit, nuk mund të jetë më e ulët se 6 000 000 (gjashtë milionë) lekë. Tarifa e primit të sigurimit nuk mund të jetë më e ulët se 0.5 për qind e shumës së siguruar të përcaktuar në formularin e Policës së sigurimit.

**2.** Përfitimi i përgjithshëm i pagueshëm për çdo Të Siguar në lidhje me Paaftësinë e Plotë të Përhershme që vjen si rrjedhojë e të njëjtit dëmtim, llogaritet duke mbledhur vlerat që rezultojnë nga zbatimi i pikave B (1 – 21) , D dhe E të tabelës së përfitimeve për dëmtimin në fjalë, por përfitimi i përgjithshëm i pagueshëm për cdo Të Siguar në asnjë rast nuk do të kalojë 150% të shumës së sigurimit dhe Siguruesi nuk do të jetë më përgjegjës sipas kësaj Police për të njëjtin të Siguar për Dëmtime Trupore Aksidentale.

**3.** Përfitimi i përgjithshëm i pagueshëm për cdo të siguruar në të gjitha rastet e tjera, përveç atij të pikës 2 të këtij seksioni (VIII. Kushte të vecanta), nuk do të kalojë 100% të shumës së sigurimit dhe Siguruesi nuk do të jetë më përgjegjës sipas kësaj Police për të njëjtin të Siguar për Dëmtime Trupore Aksidentale

**4.** Përfitimi i përgjithshëm agregat vjetor i pagueshëm nga siguruesi për të gjithë të siguruarit që përcaktohet në formularin e Policës së sigurimit, nuk mund të jetë më i ulët se katërfishi I shumës minimale të sigurimit të përcaktuar në pikën 1 të këtij seksioni.

**5.** Në rastet kur I Siguruari është mëngjërrash, përqindjet e përfitimeve të pikës B nga 11 deri 14 më sipër do të këmbehen duke pasur parasysh se përqindja më e lartë e përfitimit do të zbatohet për dorën e majtë dhe pjesët e saj.

6. Siguruesi paguan dëmshpërblimin për pasojat e drejtpërdrejta dhe të shkaktuara nga aksidenti. Në rast se në momentin e ndodhjes së aksidentit I Siguruari nuk ka qenë fizikisht i plotë dhe I shëndetshëm, janë të dëmshpërblyeshme vetëm pasojat që do të vërtetoheshin sikur aksidenti t'i kishte ndodhur një personi fizikisht të plotë dhe të shëndetshëm.
7. Në rast se shkaktohet humbja anatomike ose pakësimi funksional i një organi ose gjymtyre të dëmtuar para aksidentit, përqindjet e treguara më sipër do të zvogëlohen, duke marrë parasysh shkallën e invaliditetit të mëparshëm.
8. Në rast se për shkak të aksidentit, vjen si pasojë pakësimi por jo humbja e plotë e përcaktuar në tabelën e përfitimeve për paaftësinë e përhershme të pjesshme, përqindjet e treguara në tabelë do të zvogëlohen në përpjesëtim me shkallën e humbjes anatomike, apo funksionale.
9. Përfitimi për paaftësi të përkohshme do të paguhet për jo më shumë se 12 muaj, qoftë edhe jo të vijueshme.
10. Siguruesi është i detyruar të paguajë dëmshpërblimin që lidhet me pikat A dhe B të tabelës së përfitimeve brenda 30 ditëve nga dita e marrjes së të gjithë dokumentave të nevojshëm nga Kontraktuesi, ose I Siguruari. Përfitimet për pikën C të tabelës së përfitimeve paguhet nga Siguruesi një herë në muaj në përputhje me dokumentat vërtetues. Përfitimet sipas pikave D dhe E paguhet jo më vonë se 30 ditë pas marrjes së dokumentacionit vërtetues. Çdo pagesë e përfitimit bëhet në monedhën e treguar në Policën e Sigurimit.
11. Në rast të zhdukjes së të siguarit si pasojë e aksidentit në punë, Siguruesi paguan përfitimin sipas pikës A të tabelës së përfitimeve për humbjen e jetës, me kushtin që ekzistojnë prova të mjaftueshme që aksidenti ka çuar në vdekjen e të siguarit.

**Klauzola e sanksioneve:**

“(Ri)Siguruesi nuk do të ofrojë mbulim dhe nuk do të jetë i detyruar të paguajë ndonjë dëm apo të japë ndonjë përfitim të parashikuar në këtë kontratë, në atë masë që sigurimi i një mbulimi të tillë, pagesa e një dëmi të tillë ose sigurimi i një përfitimi të tillë do ta ekspozojnë (ri)Siguruesin ndaj ndonjë sanksioni, ndalimi ose kufizimi sipas rezolutave të Kombeve të Bashkuara apo sanksioneve tregtare ose ekonomike, legjisllacionit të Bashkimit Evropian, Shqipërisë, Mbretërisë së Bashkuar ose Shteteve të Bashkuara të Amerikës (me kusht që kjo nuk bie në kundërshtim me ndonjë rregullorë ose ligj lokal specifik të zbatueshëm për (ri)siguruesin).”